

1. Chief Minister Pu Lalduhoma'n tun hnaia ruihhlo tam tham tak mantu Sub Inspector Zirthanga chu a thawhpuite nen chawimawina an hlan dawn tih a sawi.
2. Chief Minister Pu Lalduhoma'n Thenzawl ah Muanna Khawpui (Peace City) din ani dawn a ti.
3. Home Minister Pu K Sapdanga'n ram thenawm buai karah Mizoram awm mahse Mizoram Police hnathawh chhuanawm atih thu a sawi.
4. Parliament in hnih rorel inkhawm chu vawiin khan tiamchin awm lova tihtawp ve ve a ni.

<><><>

CM on DRUGS

Chief Minister Pu Lalduhoma'n tun hnaia ruihhlo tam tham tak mantu Sub Inspector Zirthanga chu a thawhpuite nen chawimawina an hlan dawn tih a sawi.

Vawiina Tuirihiau Run, Buangpuia Vantawng Group YMA Inkhawmpui vawi 26-na a hmanpuinaah, Bialtu MLA leh Chief Minister Pu Lalduhoma chuan thu sawiin Ruihhlo dona kawngah sorkar chuan tha a thlah dawn lo a ti a, YMA chu mipuite nun kawng siamthatna leh khawtlang nun venhimna kawnga an thawhpui pawimawh ber an nih avangin, mawhphurhna sang tak an chelh tih hre reng turin a chah a ni.

Vawiin khan Kuikawn Branch YMA chuan tunhnaia Ruihhlo tam tham tak an manna ah Henry Lalbiakzinga chu a tel avangin an venga a dawr siam First Cry chu ti tawp turin hriattirna an pe a, Vengchhunga a awm zel loh chu tha zawka an hriat thu leh ram leh hnam hmelma ruihhlo tam tham tak manna ah a tel avangin pawl an tih thu an sawi baw.

<><><>

CM on PEACE CITY

Chief Minister Pu Lalduhoma'n Thenzawl chu Muanna Khawpui (peace city), mipui nuaih sawm vel chenna turin Prime Minister hnenah a dil a ti a, a hlawhtlin ngei a beisei tih a sawi.

Buangpuia Vantawng Group YMA Inkhawmpui a hmanpui na ah he thu hi sawiin Chief Minister chuan Thenzawl leh a chhehvela Peace City dinna tur Prime Minister Narendra Modi hnena a dil chu hmuh theih an in beisei a ti a, 16th Finance Commission-ah a sawi tawh thu sawiin, tun dinhmunah Ministry of Housing and Urban Affairs chuan master plan siamna tur cheng vaibelchhe sawm a phalsak a, hun erawh a la duh deuh dawn niin a sawi.

Pu Lalduhoma chuan Thenzawl leh Serchhip damdawiin chu khawl thara thuam chak a ni dawn a ti a, Thenzawla PWD Division dah thar turin sawrkarin hma a lak thu sawiin Vantawng khawthlaa Rope Way siam thuai an tum thu a a sawi baw.

Pu Lalduhoma chuan ram hmasawna chu sawrkarin a ngaih pawimawh ber ni mah se, mipuite chhungril nun a chhiat si chuan hmasawna tluantling a ni theiin an hre lo a ti a, hei vang hian mipui sukthlek siamna keng tel hmalakna an kalpui zel dawn tih a sawi. Vawiin chawhnu inkhawmah hian khualzahawm Pu B. Lalchhanzova'n thu a sawi a, Vantawng Group YMA-ah hian branch 13 awmin, member hi 7523 an awm a. member 62 boral ta te chu nimen rorel inkhawmah sun an lo ni tawh a ni.

<><><>

HOME MINISTER

Home Minister Pu K Sapdanga'n ram thenawm buai karah Mizoram awm mahse Police ten venhimna tha takin an thawk a ti a, ruihhlo tawhruk ven kawngah Mizoram Police hnathawh chhuanawm atih thu a sawi.

He thu hi vawiina Police Conference a hmanpuinaah sawiin Pu K Sapdanga chuan ruihhlo do kawngah Police hnathawh chu chhuanawm atih thu sawiin tha thlah thei annih loh avangin theihtawp chhuah chhunzawm zel turin a chah a, tun dinhmunah police post 4000 chuang a ruak mek tih sawiin Police te chu an hna a zahawm avangin mipuite entawn tlaka an awm a ngaih thu a sawi baw.

Minister chuan Police dept chu thla 13 hlawh an lak avangin thla 13 hna thawk tura ngaih an ni a ti a. Police zinga hriselna thalo an tam chu ngaihtuah awm atih thu sawiin insiamthatna tur tam tak an nei a ti a, Police tan an post ngaia awm reng a theihloh tih sawiin transfer dil an tam thin chu pawl atih thu a sawi a, tun hnaia Police Constable an lak dan chu mipuite pawhin dik an tih thu leh sawiseltu an la awm lo tih a sawi bawk.

<><><>

LUNGLEI WATER SCARCITY

Lunglei khawpuia tui harsatna chuan zual lam a pan mek zel a, Sorkar lam atanga PHE in an sem bak chu mipui chhawmdawlina turin ruahmanna siam a la awm lo.

Lunglei khawpuiah thla khat dawn lai tui a haw mumal loh avangin tui harsatna chuan zual lam a pan zel a, PHE Department sawi danin kumina tui hna kang chu kumdang aiin a nasat thu leh ruah a sur mai loh chuan buaina lian zawk an tawk thei dawn an ti a, pump na tur khawl nei tha mahse a pump tur tui a awm miau loh avangin harsatna lian tak an tawk mek an ti a, Tlawng luia Concrete Gravity Dam siam mek chu a hnathawktu Contractor chuan zawh hun tur a tihah a zawh hman loh avangin thla 6 dang atan pawhsei sak a ni a, tun dinhmunah khawpui chhungah tuikhur 90 a awm mek thu sawiin a thianghlim em tih enfiah zel a ni an ti a, a tam zawk chu thinghlimlo anih vangin Laboratory-ah test mek niin tuikhur tui chu ei leh in rawngbawl nan a ring chuan chhuangso hram se an duh tih an sawi bawk.

PHE hotute sawi danin ram chereu nasat avangin tui hna kang chat tam tak a awm an ti a, tun dinhmunah tui connection 16,012 awm mekin consumer te hnenah tui sem chhuak vek tur chuan thla khat dawn ngah a ngaih tur thu an sawi bawk.

Lunglei khawpuiah Tui a harsat chhoh zel avangin mipui nunphungah harsatna tam tak a thleng a, thla khat chhung a haw mumal loh avangin tui thianghlim in tur a tam tawhlo hle a, intur tui Mineral Water pawh dawr atanga lei tam tak awm tawhin tui hman tur pawh motor hmanga chawi lei an tam hle a, Sawrkar thuneitute chuan ram chereu nasat avangin tui hna kang a tam thu sawiin Lunglei tui lakluhna tur hnathawh mek chu zawh fel ala nihloh avangin tui hi a harsat chhunzawm zel a ni.

<><><>

MIZORAM TOPS NE IN TELECOMMUNICATIONS

Ram ei leh bar dinhmun sawifiahna Economic Survey 2024 atanga 2025 inkarin a tarlan danin Mizoram chu hmarchhak state zinga tunlai thiamna hmanga inbiakpawhna lama hmasawn ber state a ni.

Ministry of Development of North Eastern Region thuchhuah tarlan danin Mizoram chu tunlai thiamna hmanga inbiakpawhna lama a hmasawanna chu za zela 113.29 a ni a, hei hi thingtlang ah za zela 94.19 niin khawpuiah za zela 128.83 a ni.

Rampum huapa Sawrkar laipuiin survey a neih atanga tarlan danin sawrkar kum liam ta ah thingtlang lamah broadband hmasawanna nasa tak a thleng a, za zela 71.4 ni thin kha za zela 79.54 in hma a sawn a ni.

Mihring nuai 12 vel ber awmna Mizoram ah hian mobile phone connection nuai 16 chuang a awm a, hei hi State Economics & Statistics in kum 2023-a a tarlan dan niin Mizoramah inbiakpawhna lama hmasawanna a thleng nasa hle a, Tunlai khawvel hmasawanna leh changkanna in a ken tel internet leh phone hmanga inbiakpawhna hi mi tu pawhin kan hman nasa tawh em em a, Pi Pu ten an lo suangtuah thiam phak bakin kan nunphung a inthlak a, kan rilru put hman leh khawvel thlir dan pawh nasa takin a inher danglam tawhin tunlai thiamna in kan nunah tel ve na tam tak a nei a ni.

<><><>

NTCP

National Tobacco Control Programme State Consultant R Lalremruata’n Mipui hriselna in hma a sawn theih nan mipui nawlpuiin zuk leh hmuama insum an ngaih thu a sawi.

He thu hi vawiin Aizawl Press Club a zuk leh hmuam chungchanga Consultative Meeting an neihna ah sawiin Pu R Lalremruata chuan Mipuite hriselna a that zawk theih nan zuk leh hmuama insum chu a pawimawh a ti a, Naupan lai atanga ruihhlo ti tan chu an ngawl veina a nghet tawh tih sawiin kum naupang lamah ruihhlo ti lo tura inzirtir uar a pawimawh tih a sawi.

NTCP Consultant chuan mipuite inhrilh leh zirtir uar a pawimawh tih sawiin a thatlohna sawi tam a pawimawh a ti a, puitlingah pawh zirtirna a pawimawh tih sawiin zirna in leh puipunna hmun hrang hrangah inzirtir chuan nghawng tha zawk a neih a beisei thu a sawi bawk.

<><><>

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni. Naktuk zing dar 7 leh a chanve-ah Chanchintha puan leh a ni ang.

<><><>

WASTE TREATMENT FACILITY

UD&PA Minister Pu K.Sapdanga'n damdawi in, mihring leh ran hriselna enkawlna hmun atanga chhuak bawlhhlawh sawngbawlna tur 'Common Bio-medical Waste Treatment Facility, Tuirial' ami a hawng.

Minister chuan Aizawl khawpui chhung leh Saitual district-a damdawiin leh Clinic-te chu a hmahruai atan tuam hmasak a nih tur thu a sawi a. Bawlhhlawh sawngbawl hautak leh fimkhur ngai tak sawngbawlna hmun, a taka hman tur a peihfel a ni chu a hmang tangkaitu tur Damdawi in leh Clinic-te tan thu lawmawm tak a nih thu sawiin bawlhhlawh lakkhawm leh sawngbawlna senso chawi ngai te pawh thinlung inhawng tak chung a zawm a pawimawh thu a sawi a. He hmalakna hian khawtlang hriselna kawngah hmasawnna thui tak a thlen ngei a beisei thu a sawi.

Hemi chungchangah hian Mizoram Pollution Control Board chuan thuchhuah siamin Bio Medical Waste Management Rules 2016 in a phut angin damdawiin leh damdawi lam kaihnnawih bawlhhlawh chi hrang hrang, mihring leh ran taksa bung hrang hrang, lapua/plaster/bandage/puan thisen kai, syringe, zun ip, thisen chaw khaina hmanrua leh inzaina lam chi zawng zawng te chu a bika sawngbawlna tura siam Bio Medical Waste Treatment Facility, hmunah chauh paih tawh tur ani tiin thuchhuah a siam a, a hmuna paih lo te chu hrem theih an nih thu an sawi.

MPCB chuan Damdawiin leh damdawi kaihnnawih bawlhhlawh nei chi hrang hrang sawrkar leh mimal damdawiin leh hetiang hmang thei chi hrang hrang te chuan dan zawm ngei turin an ngen tih an sawi baw.

<><><>

PM

Parliament in hnih rorel inkhawm chu vawiin khan tiamchin awm lova tihtawp ve ve a ni. Heti hian Parliament Budget Session chu tihtawp a ni ta a. January ni 31 khan session hi tan a ni.

Lok Sabha Speaker Om Birla chuan tun tum budget session-a an thawhchhuah chu zaa 118 lai anih thu a sawi a. Lok Sabha hian bill 16 tun session chhung hian an pass tih a sawi baw a ni.

<><><>

PM

Prime Minister Narendra Modia chuan vawiin khan Bangkok-a Bay of Bengal Initiative fro Multi-Sectoral Technical and Economic Cooperation (BIMSTEC) Summit vawi 6-naah a tel. Thusawiin Prime Minister Modia chuan BIMSTEC chu khawvel siamthatna tura hmun pawimawh tak anih thu a sawiin thawhhona tha zawk a awm theih nan tan lak a tul thu a sawi a. 21-poin Action Plan rawtna siamin kawng hrang hranga thawhhona tur ruahmanna a tarlang a. BIMSTEC ramte chu sumdawnna lama thawhhona uar lehzual tura sawmin BIMSTEC Chamber of Commerce din anih thu a puang a. Kumtina BIMSTEC Business Summit neih thin a nih tur thu a sawi baw a ni.

Pu Modia chuan BIMSTEC Maritime Transport Agreement ziah a ni chu lawmawm atih thu sawiin BIMSTEC Bangkok Vision 2030 leh Report of BIMSTEC Eminent Persons Group pawm a ni chu lawmawm atih thua sawi baw a ni.

<><><>

RAILWAY

Union Cabinet chuan Ministry of Railway hnuaiah project pali cheng vaibelchhe sing 1 sang 8 leh 658 senga thawh tur a pawm. New Delhi-a chanchinbumite kawmin Union Information and Broadcasting Minister Ashwini Vaishnaw chuan heng project te hian state pathum Maharastra, Odisha leh Chhatisgarh-a district 15 a huam dawn a. Tuna Indian Railway hnuaia km 1247-a thui rel kawng awmsa chu a ti pung dawn a ni. Project hnuaiah hian Sambalpur-Jarpad line thumna leh line li na, Jharsuguda- Sason line 3 na leh line 4 na, Kharsia-Naya Raipur- Parmalkasa line 5 leh line 6 na leh Gondia-Balharshah Doubling na turte a ni a. Union Minister chuan zin veivahna leh bungraw thawn pawh a awlsam phah sawt dawn tih a sawi a ni.

<><><>